



## **Protocol dalla radunanza communal digl cumegn da Surses digls 27 da mars 2023 (nr. 01-2023)**

<b>Li ed oura</b>	Sala Grava a Savognin, allas 20.00
<b>Preschaints:</b>	82 votantas e votants
<b>Parsoura:</b>	Leo Thomann, mastral
<b>Actuar:</b>	Beat Jenal, canzlist

---

### **1. Bavagnaint ed elecziun digls dombravouschs**

Igl mastral benevainta las persungas preschaintas alla radunanza communal. Siva d'ena curta infurmaziun davart igl adiever digl lungatg e la practica da rediger e publitgier igl protocol dalla radunanza communal, constatescha igl mastral tgi la radunanza communal odierna seia neida convocada conform alla constituziun, uscheia tgi ella seia cumpetenta da decider.

Glista da tractandas:

01. Bavagnaint ed elecziun digls dombravouschs
02. Lescha davart igl adiever da fis artificialas
03. Dumonda dalla Pendicularas Savognin SA da prolungar igl contract d'amprest existent da CHF 2'000'000.00 conc. la construcziun dalla telecabina Savognin - Tigignas anfignen la fegn 2023
04. Barat da surfatscha parziala da 632 m2 tranter parcella an dretg da biagier nr. 5450, Gravas, Cunter, an possess da Fredy von Büren, e parcella an dretg da biagier nr. 5452, Gravas, Cunter, an possess dalla Devonas Gips SA
05. Project d'investiziun «renovaziun dalla centrala termoelectrica sen distanza tar la serenera a Cunter»: dumonda per credit d'object da CHF 240'000.00
06. Credit d'investiziun «equipaziun Gôt Grond, Tinizong»: dumonda per credit d'impegn net da CHF 750'000.00
07. Project d'investiziun «arena da sport La Nars a Savognin»: infurmaziun conc. igl ulteriour proceder
08. Diversas infurmaziuns
09. Varia

Causa tgi seian preschaints giasts per la tractanda davart igl project d'investiziun "equipaziun Gôt Grond, Tinizong" propona igl mastral da midar la successiun dallas tractandas e piglier lez affar gist siva igl bavagnaint e l'elecziun digls dombravouschs. Ni cunter la proposta da midar la successiun ni cunter la glista da tractandas vignan fatgas objecziuns, uscheia tgi la glista da tractandas incl. midada dalla successiun digls affars vala scu approvada.

Scu dombravouschs vignan proponias ed eligias cun gronda pluralitad Damian Cadotsch, Guido Luzio, Pascal Murbach e Mitgel Collet.

---

### **2. Project d'investiziun «equipaziun Gôt Grond, Tinizong»: dumonda per credit d'impegn net da CHF 750'000.00**

Igl project vign preschainto digl mastral. El infurmescha davart igl project da far ena nov'equipaziun digl Gôt Grond tranter Tinizong e Savognin, cun accentuar pertge tgi dovra chella nov'equipaziun ed igls avantatgs tgi chel project porta per la cultivaziun e la tgira digl gôt.

Igl project da construcziun preschaint cumpeglia la construcziun d'ena nova punt cumponeida da lenn e da betun sur la Gelgia aint igl territori dalla rezgia dalla Resurses SA a Tinizong e la construcziun d'ena veia da gôt da radond 1.6 kilometers davent dalla nova punt an direcziun da nordvest anfignen tar l'antieriura rezgia da Savognin aint igl territori da Sur Sarons. La nova equipaziun corresponda ad ena veia da gôt cun ena larghezza minimala da 3.30 m ed ena tonnascha da 40 t, infurmescha igl mastral. Uscheia possa tot la lenna digl perimeter da project e dalla Val Nandro neir transportada sainza svieidas anfignen tar la rezgia a Tinizong. Cotras vigna la vischnanca da Savognin discargeda digl traffic da camiuns pesants.

Premess tg'igl credit vigna approvo, vigna igl project realiso an dus etappas. Igl onn current duess neir erigeida la punt dalla Gelgia ed igl onn proxim neir construeda la veia da gôt.

Igls costs per realisar igl project sa cumponan scu suonda:

- Construcziun nova dalla punt dalla Gelgia	CHF	1'200'000.00
- Construcziun nova dalla veia	CHF	1'950'000.00
- Destrucziun dalla punt dalla Gelgia existenta	CHF	100'000.00
<b>Total</b>	<b>CHF</b>	<b>3'250'000.00 (incl. TPV)</b>

Tar igls costs da construcziun menziunos soura sa tractigl d'ena calculaziun digls costs cun basa da prietschs 2022 cun en'exaktezza digls costs da +/- 10%, daclera igl mastral. Igls prietschs inditgias seian nias calculos a basa da valetas d'experientscha da projects cumparabels. Tenor la posiziun digl Uffezi da gôt e prievens dalla nateira digls 13 da schaner 2023 ins possa chintar cun contribuziuns da cantun e confederaziun da 77%, uscheia tgi resultan costs nets pigl cumegn d'angal ca. CHF 750'000.00.

Igl mastral renda attent alla procedura per l'approvaziun digl credit. Considero igls costs bruts da CHF 3'250'000.00 (incl. TPV) stuess la dumonda per l'approvaziun digl credit neir sottamessa agl cumegn d'urna da Surses. Tenor art. 16 dalla lescha da finanzas digl cantun Grischnun seiigl pero pussebel da dumandar angal l'approvaziun digl credit net, schinavant tgi seia avantmang ena garanzeia lionta davart igl paiamaint da contribuziuns cantunalas e federalas.

Essend tg'ins vegia survagnia pigl project preschaint ena garanzeia da contribuziun da radond 77% digls costs da construcziun, vigna sottamess la dumonda per en credit net da CHF 750'000.00 alla radunanza communalu scu istanza finala.

Siva las dilucidaziuns digl mastral cumplettescha igl responsabel digl Uffezi da gôt e prievens dalla nateira regiun Moesano/Grischnun central las infurmaziuns digl mastral cun render attent alla muntada digl project per l'economia forestala e cun infurmar davart la procedura d'approvaziun. I possa dar anc eventualas adattaziuns ve digl project, per cass tgi dess anc recurs cunter igl project u per cass tg'igl cantun giavischess anc midadas.

Inschignier Gian Jegher digl biro Widmer Ingenieure SA da Coira/Tinizong, responsabel per la planisaziun dalla punt nova sur la Gelgia, infurmescha alla fegn anc davart igls muteivs tg'ins on da far ena punt nova ed an tge furma tgi chella vigna construeda.

Dalla discussiun daverta fon en votant ed ena votanta adiever:

- Dumonda: ins pò chintar per la construcziun digl punt cun contribuziuns or digl fond per renaturalisaziuns dallas ovras electricas digl martgea da Turitg ewz?  
*Rasposta:* igl mastral infurmescha tg'ins seia an contact cun ewz per sclareir la dumonda da contribuziun or digl fond per renaturalisaziuns.
- Dumonda: aint igl territori digl punt nov a Tinizong dattigl diversas veias da viandar. È chegl nia risguardo aint igl project?  
*Rasposta:* igl mastral infurmescha tg'ins seia cunsciaint dalla dumonda. I possa esser tg'igl Sarvetsch per igl traffic betg motoriso digl cantun fetscha pretensiuns da midar igl tratg dallas veias da viandar. Ena decisiun correpondenta dettigl pigl mument pero betg.

#### Resultat dalla votaziun:

Sen proposta dalla supranza decida la radunanza communalu cun 76 vuschs cunter 1 vusch d'approvar igl credit d'impegn net da CHF 750'000.00 (incl. TPV) per realisar l'equipaziun digl Gôt Grond tranter Tinizong e Savognin, cun resalva dall'approvaziun digl project antras la regenza ed igl paiamaint dallas contribuziuns aint igl rom garantia. La supranza communalu vign a madem taimp incumbensada cun l'execuziun.

### 3. Lescha davart igl adiever da fis artificialas

Vicemastral Giancarlo Torriani preschainta igl affar ed infurmescha tgi igls 19 d'avregl digl onn passo seia neida inoltrada en'iniziativa cun igl intent da relascher en scumond general da fis artificialas sen igl territori digl cumegn da Surses. Per la suprastanza seia en scumond general da fis artificialas ia mengia gliunsch e percheigl ins vegia elaboro ena lescha davart igl adiever da fis artificialas, scu cunterproposta all'iniziativa. Igl sboz da chella lescha, tgi pussibilitescha alla suprastanza communal da lubeir excepziuns sen dumonda giustifitgeida, ins vegia preschento gl'amprem agls amprens 5 sotsignias dall'iniziativa. Siva en taimp da ponderaziun vegian chels alloura decida da retrer l'iniziativa e lascher votar davart la cunterproposta, vot deir la lescha davart igl adiever da fis artificialas tgi stetta oz an discussiun, infurmescha igl vicemastral.

Siva la sia introducziun preschainta igl vicemastral igls singuls artetgels dalla lescha.

Alla fegn dallas sias expectoraziuns accentuescha igl vicemastral anc eneda tgi cun la lescha preschainta vigna bagn reglo igl adiever da fis artificialas sen igl territori digl cumegn da Surses, ma betg digl tottafatg scumando. Cun l'obligaziun da stueir dumandar ena lubientscha speziala saptga la suprastanza communal garanteir tgi en fi artificial vigna vido angal a caschung d'occurrentas mutivadas e tgi disturbis caschunos da fis artificialas restan ainten en rom commensuro.

Dalla discussiun daverta fò egn digls amprens sotsignias dall'iniziativa ed en ulteriour votant adiever:

- Igl inziatant dall'iniziativa renda attent tgi la suprastanza communal vegia previa ainten la lescha ena clausula d'excepziun, uscheia tgi seia anc adegna pussebel da survagneir ena lubientscha per vidar fis artificialas. Chella practica seia ord vista digls amprens sotsitgnias dall'iniziativa problemtica. Cun dar lubientschas d'excepziun vigna puspe produtgia rusment digls fis artificialas, tgi vigna a restar per tera ed er aint igls pros. El fò percheigl la proposta da far stritgier igl art. 8 (excepziun cun obligaziun da lubientscha) or dalla lescha. Lubias duessan esser angal fis artificialas tenor art. 7 al. 2, vot deir fis artificialas da meisa, sbrenzlas, fis bengals, gleichs romanas, vulcans, tizungs e shows da fi.
- En ulteriour votant peglia igl pled e sustigna la proposta da stritgier igl art. 8 or dalla lescha. Sot igl aspect dalla protecziun digl clima fetschigl absolutamaintg senn da scumandar igls fis artificialas.

Igl mastral accentuescha tgi la suprastanza seia ancunter da relascher en scumond per fis artificialas. Tar tschertas occurrentas pudessigl sainz'oter esser giustifitgia da lascher eir fis artificialas. Percheigl pladescha el da betg stritgier igl art. 8.

Cuncheigl tgi dat nigns oters votums metta igl mastral an votaziun la proposta digl votant da stritgier igl art. 8 tgi pussibilitescha alla suprastanza da dar lubientschas excepziunalas per occurrentas spezialas. Chella proposta survign 39 vouchs. La proposta dalla suprastanza survign 34 vouchs. Uscheia vala la proposta digl votant, cheigl vot deir igl art. 8 vign stritgia or dalla lescha. Igl mastral renda attent, tg'igl fatg da stritgier igl art. 8 vegia er consequenzas sen art. 9 e 10.

#### Resultat dalla votaziun:

La radunanza communal decida cun 68 cunter 11 vouchs d'approvar la lescha davart igl adiever da fis artificialas, risguardond la proposta acceptada da stritgier igl art. 8 e cun las midadas correspondentas pigls art. 9 e 10. La lescha vo an vigour per data digl conclus.

---

### 4. Dumonda dalla Pendicularas Savognin SA da prolungar igl contract d'amprest existent da CHF 2'000'000.00 conc. la construcziun dalla telecabina Savognin - Tigignas anfignen la fegn 2023

Igl mastral daclera, tgi la radunanza communal digls 29 da matg 2018 vegia concedia alla Pendicularas Savognin SA (SaBB SA) en amprest sainza tschains da 2 miu. francs an connex cun la construcziun dalla telecabina Savognin - Tigignas. Sa basond sen chel conclus seia nia stipulo igls 16 da november 2018 en contract correspondent pertutgont igl paiamaint digl amprest

respectiv. Cunchegl tgi las pendicularas vegian gia l'intenziun da vender lour part dallas aczias dalla Surses Alpin SA, seian neidas fixadas las cundiziuns suandontas aint igl contract d'amprest:

- la SaBB SA venda la part dallas sias aczias dalla Surses Alpin SA anfignen igls 31 da december 2022 e restituescha igl amprest da 2 miu. francs agl cumegn per igls 31 da december 2022, u
- ella tigna igl pachet d'aczias e restituescha igl import digl amprest an otra moda, u
- igl cumegn da Surses surpeglia igl pachet d'aczias dalla SaBB SA anfignen igl pi tard igls 31 da december 2022 per igl prietsch da stema resp. maximalmaintg 2 miu. francs.
- per cass tg'igl amprest vess betg dad esser restituia anfignen igls 31 da december 2022, vign pretandia en tschains da retard da 2%.
- las aczias dalla Surses Alpin SA tgi èn an possess dalla SaBB SA sa cattan scu impegn aint igls mangs digl cumegn da Surses. Chegl anfignen tg'igl amprest è amortiso.

Scu chegl tg'igl mastral infurmescha, seia igl amprest da 2 miu. francs betg nia restituia anfignen igls 31 da december 2022 e la SaBB SA vegia er betg dumando agl cumegn da surpiglier igl pachet d'aczias. Chegl per la raschung tgi la Surses Alpin SA seia gio siva d'en taimp an tractativas concretas cun en cumprader potenzial. Per differents muteivs tardeivan las tractativas da compra. Per aveir taimp avonda per las tractativas e la vendita planisada dallas aczias dalla Surses Alpin SA, dumondan las pendicularas da Savognin da prolungar igl termin per restitueir igl amprest per en onn, vot deir anfignen igls 31 da december 2023.

La suprastanza seia favorevla alla dumonda dalla SaBB SA da prolungar igl contract d'amprest anfignen igls 31 da december cun tot las cundiziuns stipuladas, daclera igl mastral. Igl amprest vegia però da neir tschainso a parteir digl 1. da schaner 2023 cun 2%. La prolungaziun digl contract d'amprest cun las cundiziuns correspondentas vigna fixada ainten en'aggiunta tar igl contract existent. Vess igl amprest betg da neir restituia anfignen la fegn digl onn, vigna pretandia en tschains da retard da 4% a parteir digl 1. da schaner 2024, terminescha igl mastral las sias expectoraziuns.

Dalla discussiun daverta na vign betg fatg adiever.

#### Resultat dalla votaziun:

Sen proposta dalla suprastanza decida la radunanza communal unanimamaintg d'adereir alla dumonda dalla Pendicularas Savognin SA da prolungar igl contract per igl amprest da 2 miu. francs anfignen igls 31 da december 2023. Per igl amprest ò la SaBB SA da paer 2% tschains, retroactivamaintg a parteir digl 1. da schaner 2023 pigl onn current.

---

### **5. Barat d'ena surfatscha parziala da 632 m2 tranter la parcella cun dretg da biagier nr. 5450, Gravas, Cunter, an possess da Fredy von Büren, e la parcella cun dretg da biagier nr. 5452, Gravas, Cunter, an possess dalla Devonas Gips AG**

Igl commember da suprastanza Romeo Poltera, tgi preschainta igl affar, infurmescha tg'igl anteriour cumegn da Cunter veva concedia a Fredy von Büren en dretg da biagier autonom e permanent per la parcella cun dretg da biagier nr. 5450 a Gravas, Cunter, cun ena surfatscha da 3'038 m2. Igl contract da dretg da biagier cumpeggia igl dretg d'eriger bietgs, lengias d'affluenza ed indrezs da menaschi per en luvratori da scrinareia cun magasign e d'utilisar las parts dalla parcella an dretg da biagier betg surbiageidas scu conturn per igl menaschi da scrinareia e magasign.

Mademamaintg vegia igl cumegn concedia alla Devonas Gips SA en dretg da biagier autonom e permanent per la parcella cun dretg da biagier nr. 5452 da 1'507 m2 tgi seia cunfinanta a chella da Fredy von Büren. Igl contract da dretg da biagier cumpeggia igl dretg per en magasign cun tgombras pigl personal e locals annexs scu er per en magasign cun quota d'abitar.

Tots dus contracts da dretg da biagier cozzan anfignen igls 31 da december 2068, infurmescha Romeo Poltera.

An consequenza digl pensiunamaint seia Fredy von Büren an tractativas per la vendita digls sies luvratoris e magasigns. Igl cumprader potenzial vegia betg basigns dalla surfatscha parziala da 632 m2, noua tgi sa catta en magasign cun regals ots. Cunchegl tgi chella surfatscha seia cunfinanta alla parcella cun dretg da biagier dalla Devonas Gips SA, seia chella societad

interessada ve da chella surfatscha parziala. Percheigl dumonda Fredy von Büren da separar la surfatscha parziala da 632 m2 dalla sia parcella cun dretg da biagier e da l'aggiuntar alla parcella cun dretg da biagier dalla Devonas Gips SA. Cun resalva dall'approvaziun dalla radunanza communal stoptga l'adattaziun digls contracts da dretg da biagier neir stipulada mintgamai ainten en'aggiunta correspondententa.

Scu chegl tgi Romeo Poltera infurmescha, dettigi ord vista dalla suprastanza communal nigna objecziun cunter chel barat, cuncheigl tg'igl tschains digl dretg da biagier seia identic ainten tots dus contracts ed igl cumegn vegia uscheia nign disvantatg. Las taxas da notariat e digl codesch funsil scu er igls costs digl geometer ed ena eventuala taglia da midada da mang geian a chint digls dus possessours dallas parcellas cun dretg da biagier.

Cuncheigl tg'igls contracts da dretg da biagier seian nias concedias dalla radunanza communal digl anteriour cumegn da Cunter e tgi la surfatscha surpassa igls 500 m2, stoptga la radunanza communal approvar chel barat.

Dalla discussiun daverta vign betg fatg adiever.

#### Resultat dalla votaziun:

Sen proposta dalla suprastanza decida la radunanza communal cun 81 vuschs e nigna cuntervusch da lubeir la separaziun dalla surfatscha parziala da 632 m2 dalla parcella cun dretg da biagier nr. 5450 an possess da Fredy von Büren e la fusiun dalla surfatscha correspondententa cun la parcella cun dretg da biagier nr. 5452 an possess dalla Devonas Gips SA. Igl barat vign registro aint igl codesch funsil cun en'aggiunta, sot la resalva digl consentimaint da tots dus retschaveiders digl dretg da biagier.

---

## **6. Project d'investiziun «renovaziun dalla centrala termoelectrica sen distanza tar la serenera a Cunter»: dumonda per credit d'object da CHF 240'000.00**

Igl parsoura digl departamaint responsbel per la dismessa d'ava persa, Adrian Ballat, infurmescha tgi tar la serenera Sot Gôt a Cunter seia neida installada igl onn 2007 ena centrala termoelectrica sen distanza (BHKW). Igl tgod tgi vigna produtgia cun chella centrala termoelectrica vigna nizigia durant igl antier onn per scaldar principalmaintg la tor da fermentaziun. I vigna produtgia mintg'onn an media radond 75'000 kWh. Igl dus davos onns seian pero s'augmentadas las interrupziuns digl agregat ed i seia nia caschuno costs da reparatura e da ramplazzamaint per la compra da cumponentas da radond CHF 27'000.00, daclera supstant Adrian Ballat. Perveia dallas interrupziuns seiigl er sto basigns da far numerous sarvetschs da pichet durant la notg e las fegns d'emda. Igl davos taimp seia la situaziun davantada pi critica ed ins stoptga constatar tgi la centrala termoelectrica vegia contanschia la sia fegn da funcziun.

Siva evaluaziun da diversas alternativas ins vegia decida da ramplazzar la maschina actuala cun dus centralas termoelectricas pi pitschnas. Chegl vegia igl avantatg da pudeir far adiever, an cass da revisiuns e disturbis, dalla sagonda maschina. Igl costs per la renovaziun montan tenor offerta a CHF 240'000.00 (incl. TPV).

Dalla discussiun daverta vign betg fatg adiever.

#### Resultat dalla votaziun:

Sen proposta dalla suprastanza decida la radunanza communal unanimamaintg d'approvar igl credit da CHF 240'000.00 (incl. TPV) per ramplazzar la centrala termoelectrica sen distanza dalla serenera a Cunter. La suprastanza communal vign a madem taimp incumbensada cun l'execuziun.

## **07. Project d'investiziun «arena da sport La Nars a Savognin»: infurmaziun conc. igl ulteriour proceder**

Avant d'infurmar davart igl ulteriour proceder an connex cun la realisaziun dall'arena da Sport a La Nars, Savognin, dat igl mastral igl pled ad Armando Janett, commember dalla cumischung da gestiun. La cumischung da gestiun vegia intercurria la lavour dalla suprastanza communal an connex cun igl project da La Nars e detta giu oz igl sies rapport an tgossa.

Armando Janett dat ena survista cronologica davart igls divers fatgs an connex cun igl project d'investiziun "arena da sport La Nars, Savognin".

Igl Uffezi da cumegns digl cantun Grischun seia a cunaschientscha digl rapport preschaint, infurmescha Armando Janett, avant tg'el renda attent, tgi divers factours, tranter oter la ghera an Ucraina, vegian caschuno ena gronda carascheia, tgi seia betg stada previsibla an chest rom. Causa tgi la dumonda per en credit supplementar seia neida negada digl cumegn d'urna Surses, vegia la suprastanza gia da ponderar scu tg'ins possa far spargnamaints, chegl pero sainza midar igl character uriund digl project da maniera fundamentala. Schiglio fissigl sto da sottametter agl cumegn d'urna ena dumonda da midada da project per l'approvaziun.

Concludond possa la cumischung da gestiun constatar tgi la suprastanza vegia commess nigns sbagls da procedura. Ins spetga ossa pero tg'igl project vigna realiso aint igl rom financial concedia digl suveran cun risguardar la carascheia da max. 10%.

Siva las infurmaziuns digl commember dalla cumischung da gestiun surpeglia igl mastral igl pled ed infurmescha an detagl davart las midadas fatgas ve digl bietg da menaschi e gastronomieia per esser an maseira da redutgier igls costs. Pinavant daclera igl mastral er tgi cun dumandar igl credit d'impegn da CHF 4'500'000.00 ins vegia betg menziuno explizitamaintg la carascheia. Chegl er causa digl fatg, tgi igls davos onns ins vegia gia nigra carascheia. Oz saptgan nous pero, tgi tot las investiziuns seian pertutgeidas d'ena gronda carascheia. Percheigl seiigl da risguardar tar igl project da La Nars ena carascheia da 10%. Considero chest fatg ins vegia fatg cun la Uffer SA en contract per las lavours cun fixar en plafung da costs da CHF 4'950'000.00. Cun las midadas decideidas ve digl bietg da menaschi e gastronomieia - tg'ins vegia digl reminent er discuto cun la cuminanza d'interess La Nars e cun la scola da skis da Savognin - ins seia persuadia da saveir purtar a bunga fegn igl project, malgro igls spargnamaints necessaris.

Or dalla radunanza vignan fatgas nignas dumondas davart las expectoraziuns digl mastral e digl commember dalla cumischung da gestiun.

---

## **08. Diversas infurmaziuns**

Igl mastral infurmescha davart

- igls termins dallas radunanzas communalas e cumegns d'urna igl 2023.
- las elecziuns communalas igls 20 d'avost 2023 (amprem scrutini).
- l'organisaziun digl transport allas radunanzas communalas.

---

## **09. Varia**

Differentas persungas fon dumondas an connex cun la lescha da carar sen veias da fons, prada, gôt ed alps digl cumegn.

- Dumonda: on possessours dad aclas ainten la Val Nandro, tgi sa cattan direct sper veia, betg da dumandar ena lubientscha da carar?

*Rasposta:* igl mastral infurmescha tgi la suprastanza vegia decidia tgi er ensatgi tgi vegia l'accla direct sper veia dovra ena lubientscha da carar digl cumegn.

- Dumonda: ins dovra per mintga parcella agricola ena lubientscha da carar u dattigl ena lubientscha per carar tar tot las parcelas agricolas?

*Rasposta:* igl mastral infurmescha, tgi chella dumonda seia betg anc neida tractada an suprastanza. Tenor el vessigl pero dad esser pussebel da dar ena lubientscha tgi vala per tot las parcellas agricolas sen territori communal.

- Dumonda: tge pussebladad da carar sen las veias da gôt ed alps ò ensatgi tgi ò ni acla ni parcella agricola?

*Rasposta:* igl mastral infurmescha tgi er persungas sainza taragn u acla possan dumandar ena lubientscha da carar anfignen tar igls divers parcadis uffizials definos ainten la lescha da carar sen veias da fons, prada, gôt ed alps.

Oters votums vignan betg fatgs.

Igl mastral sera la radunanza communal allas 22.15 cun angraztger per la participaziun e giavischier a tots en bung arrivo a tgesa.

Tinizong, igls .....

Igl mastral:

Igl actuar:

Leo Thomann

Beat Jenal